


EAE-KO HAUTESKUNDEEN ONDOREN



JAVIER CEBOLLADA / EFE

Jose Maria Aznar Espainiako Gobernuako lehendakaria, Aragoiko PPren biltzarrean.

Aznarrek dio «aldaketaren mezua» ulertzeko «heldutasun falta» zegoela

PSOE-PP itunaren balioa eta elkarriketa Konstituzioaren barruan izatea berretsi ditu

Agentziak | ZARAGOZA

Jose Maria Aznar Espainiako gobernuburuak adierazi du euskal gizartea ez dagoela behar bezain «heldu» bere mezua ulertzeko. Aznar Zaragozan izan zen atzo Aragoiko PPren Biltzarrean Manuel Gimenez Abaden ordezkia aukeratzeko ekitaldian. Gero EAEko hauteskondeei buruzko adierazpenak egin zituen.

«Euskal gizartea eta hango egoera politikoa ez zegoen behar bezain heldu gure aldaketaren mezua onartzeko», esan zuen, eta erantsi zuen PPk betiko ildoari eutsiko diola.

EAEko PPko kideekin egotea

une honetako gauzarik garrantzitsuena dela esan zuen Espainiako gobernuburuak. «Gure lehen eginbearra da EAEko alderdikideekin egotea. Izan ere, hango PPko kideen egoera ez da beste lekuetan bezalakoa», esan zuen. Haatik, jarrera politikoa ez dela aldatuko eta jardun politikoa ez uzteko eskatu zien alderdikideei. «Inork ez dezala uzteko tentaldirik izan. Jakin behar dute guztiok beraiekin gaudela», esan zuen Aznarrek.

Bigarren betebeharrak hauteskundeetan PP edo PSE-EE bozkatu dutenekin lotu zuen Aznarrek. «Leialak eta koherenteak izan behar dugu alderdi konstituzionalei botoa eman ziguten

575.000 herritarrekin, gizartearekin eta EAEn alternatiba planteatu duten talde kulturalarekin», nabarmendu zuen.

Espainian «etsita» omen dau-de maiatzaren 13ko emaitzekin. Hori dela eta, Aznarrek esan die «lanean» segituko dutela, eta bizikidetzak baketsuarekin «konpromisoa» duela adierazi du.

Juan Jose Ibarretxe lehendakariak Ajuria Eneko ateak ireki dizkio elkarriketa ahalbidetzeko. Aznarrek erantzun dio elkarriketa horiek posible izango direla bakarrik «marko konstituzionalaren barruan».

«EAEko egoera sendotzeko hitz egitea posible da, baina egungo esparru politikoa gain-

JOSE MARIA AZNAR

Espainiako gobernuburuak

«Gure lehen eginbearra EAEko alderdikideekin egotea da, hango egoera ez baita eroso»

ditzeko bideak ez darama inora», esan zuen. Gainera, kanpoko eredurik ez aipatzeko eskatu zuen Aznarrek, Irlandako bidea gaitzetsiz. «Kontu horiekin ez da gehiago nahastu behar. Konstituzioa eta Estatutuaren barruan egin behar da guztia», berretsi zuen.

Inbestiduran Ibarretxeri ezetz esatea zalantzan jarri du Nicolas Redondok

Agentziak | MADRIL

Nicolas Redondo Terremos PSE-EEko idazkari nagusiak adierazi du litekeena dela inbestidura saioan sozialistek ez bozkatzea Juan Jose Ibarretxeren aurka. Hala egingo dute EAJ-EAko hautagaiak «joko arauak errespetatuz gero».

«Helburu politiko bat lortzeko demokraten batasuna berreskuratzen badu, ezingo diogu ezetz esan», adierazi du Redondok Telecinco telebistan.

Gizarteak esan dion tokian izango dela PSE-EE deklaratu zuen Redondok. «Leku hori oposizioan da, oraingoz», adierazi zuen. Jokaleku berriak asmatzearen alde azaldu zen PSE-EEko idazkari nagusia. «PPk eta PSE-EEk jokabide irekiak izan behar ditugu jokaleku berriak asmatzeko. Horrek ez du esan nahi oposizioa utziko dugunik; aitzitik, gobernatzeko ardura duten eta ez dutenen artean konpromisoak lotu behar ditugu, EAEn egiteko asko dagoelako», esan zuen.

PP-PSOE Itunarekin «leial» jokatu dutela jakinarazi zuen Redondok. «Erakundeekin leialak izan gara, PPekin bat egin dugu egin behar genuenarekin eta etorkizunean berdina izango da», adierazi zuen.

«Ez da PP bakartu behar»

Jose Luis Rodriguez Zapatero PSOEko idazkari nagusiak, bestalde, adierazi du PSE-EEren estrategia ez dela izango PP bakartzea; aitzitik sozialisten zeregina izango da popularrak erakartzea akordioak egin dezaten jeltzaleekin.

Redondok bat egin zuen Zapateroren ikuspuntuarekin. Oposizioan izanik, EAJrekin zenbait proposamen hitzartu nahi ditu EAJrekin, Hezkuntzari eta Ertzaintzari buruzkoak. «Ibarretxek urrats bat egiten duen bakoitzean beste bat egin behar du PSEk EAJ akordiora ekartzeko. Gizartearen interesak alderdiaren aurretik jarriko ditugu», esan zuen.

Llamazaresek «zuhur» jokatzeko eskatu dio Madrazori Jaurlaritzan egoteko aukeraz

Agentziak | MADRIL

Eusko Jaurlaritzan egoteko aukera «zuhur» aztertzeke eskatu dio Gaspar Llamazaresek IUko koordinatzaile nagusiak Javier Madrazori. «Gerta daiteke tren garaiz ez hartzea, ordu txarrean, eta trenaren azpian bukatzea», ohartarazi dio EAEko IUko koordinatzaileari. Gainera, Llamazaresek eskatu dio

edozein erabaki hartu aurretik «batasuna» beharrezkoa dela.

Madrazo prest azaldu da Jaurlaritzan sartzeko. Bere formula da PSE-EEekin batera sartzea, baina sozialistek ez badute nahi berak zer egin pentsatuko duela jakinarazi du.

Bere jokabidea sendotzeko, Madrazok adierazi du EAJ «aldatu» egin dela, 1998 urtean Lizarran hartutako bidea baz-

tertu duela. «1998. urtean egin zuen akatsa zuzentzen ari da. Orduan abertzaleak ez direnak baztertuta eraiki nahi zuen Euskadi, baina hori aldatzen ari da, EAJko sektore batek bederen bai. Gu poztzen gara horregatik», adierazi du Madrazok.

IUko Batzorde Federalak ebazpen bat onartu zuen atzo EAJ-PSE-IU gobernua hobe-

tsiz. Gobernu horrek bakarrik ahalbidetuko luke, IUko kideen ustez, Jaurlaritzak justizia sozialaren alde egitea.

PSE-EEk aurreratu du oposizioan izango dela. Horrek gauzak «zail» jartzen dizkio Madrazori, atzo aitortu zuenez. «PSE-EEk erabakitzen badu ez sartzea, zaila izango da. Hala ere, gogoratu behar da akordioaren legimititatea ez dagoela sozialisten presentziaren arabera. Legimititatea hautesleek eta programek ematen dute», ohartarazi du Madrazok.